

Fo scritto al Capitano di Verona e Colateral zeneral, che Alexandro Amai citadin nostro vol far il mestier di le arme con il signor Janus. Hessendo sufficiente, lo accepti.

Fo scritto al Podestà e capitano di Conejan, di la cassazion di Zuan Batista da Fan alozato de li, et li demo provision ducati 200 a l'anno et tansa per 8 cavali.

Fo scritto al provedador Pexaro e sier Polo Nani, atento Zuan di Naldo recusava andar con la compagnia in piacentina dicendo el Governator vol mandarlo al macello, lo debiano chiamar e dirli voglii esser ubidente, e digi al Governador, intencion nostra è che al tutto el sia obedito da cadauno.

A dì 21. Fo scritto a sier Hironimo Soranzo podestà di Antivari, come el conte Mercurio vol che Thodaro Manasi capo di stratioti di li vadi con lui in campo, però el manda suo nontio de li a tuor li soi cavali, e li lassi venir.

Fo scritto a Brexa, mandino 300 guastadori in campo.

Fo scritto a Verona, mandino Machon da Corezo e il Fra' di Pavia in campo, zonto sia prima de li Giacomo Antonio Pochipanni con li fanti 200. *Etiã* mandino Marco di Napoli et Zorzi di Vaylà, over Mafio Cagnol, qual di do ultimi parerano a loro, in campo con le loro compagnie; sichè resterà de li fanti 945 con Malatesta Bajon condutier nostro con la sua compagnia a custodia di quella terra.

Fo scritto al Podestà e capitano di Treviso, come vien de li Zorzi Sturion nontio dil Governador zeneral, per aver quello el dia aver de li; per tanto astrenzi Michiel Zuane de Cier a pagar quello el dia pagar e vender li so' beni et di so' piezi.

200* *A dì 21.* Fo scritto una patente per monsignor di Villiers nontio dil Christianissimo re, ritorna in Franza, tutti li rectori lo provedi di cavalcature di loco in loco senza spesa, e li fazi onorevoli acoglientie.

A dì 22. Fo scritto a Vicenza in risposta di soe di 20, zercha l'adunation fata e insulto di quel Tonin da Lonigo con altri soi, però avemo scritto a Verona mandino cavali lizieri e fanti per prenderli; per tanto se intendino ben con diti rectori etc.

Fo scritto al Capitano di Verona e Colateral zeneral, come per letere di Udene, Alexio Bua capo di stratioti è de li si ha dolesto che 10 soi stratioti è fuziti e andati per aconzarsi con Zorzi Busichio; però a la mostra farà el ditto Zorzi de li, habbi avertentia de li ditti.

Fo scritto a li diti, si manda di l'Arsenal nostro 6 pezi di artelarie et mille lanze.

Fo scritto a Brexa zercha dar corsaleti et alabarde et piche 300 al nontio di valesani, e quelli darano sarà satisfati di danari di la Signoria nostra di quella camera.

Fo scritto, mandar di qui per Verona prima do sacri per campo, una colobrina di 50 per Verona, uno canon di 50 per Brexa, et piche 1000, con barcha, per via del Frassine.

A dì 23. Fo scritto in Franza, in risposta di lettere di 11, zercha quel capitano monsignor San Blanchart esser gionto a Marseja etc.

Fo scritto in Anglia al Surian orator nostro, el vien de li sier Hironimo da Molin qu. sier Marin per danari el dia aver di Antonio Bavarin; per tanto li dagi favor etc.

Fo scritto a Verona in risposta di soe di eri hore 24, debano mandar do compagnie di fanti in campo subito.

Fo scritto a sier Andrea Griti provedador zeneral, et mandata la copia di la letera dil Governador. *Item*, si manda la copia di una letera intercepta di Antonio Bagaroto, drizata al marchese di Mantoa, dil qual è orator apresso l'Imperador, però la mandi al secretario Marin acciò si possi governar zerea li pagamenti di grisoni. *Item*, fo mandato ducati 1500 per pagar li fanti grisoni.

Noto. Fo mandati 18 provisionati a Corfù con sier Antonio Marzelo baylo, acciò li meti de li etc.

A dì 24. Fo scritto a Verona, che ducati 5500 li fo mandati zà tre zorni. Zonto sia de li el Provedador zeneral, li dagi per campo.

A dì 24. Fo scritto al provedador zeneral Griti, 201 come havendone scritto el Governador se mandi in campo le lanze spezade, però ne mandemo Zorzi Grimani et Zuan Valami lanze spezade di stratioti, i quali si hanno oferto far venir de inimici 50 e più stratioti; per tanto li mandemo a lui.

Fo scritto a Trevixo, si manda danari per pagar li fanti 175 di Zuan da Como, et li altri 25 farà si mandarà Sabastian di Paxe rasonato per farli la mostra e darli danari.

Fo fato una patente a Galeazo da Cluson vien in campo, capo di fanti 30, si dagi alozamento per una note.

Fo scritto al Podestà e capitano di Crema, in risposta di soe di 22, zercha il dazio di la fiera, che non lo puol afitar, per tanto lo scuodi per la Signoria nostra et poni exatori.

Fo fato una patente a Nicoliza di Aneona con fanti 25 va in campo, et scritto al provedador zeneral Griti di questo.